

Pauro Epeso ezeiksa bo ziwatahaka

Pauro Epeso ezeiksa tuk niapykyrykspyk petok ziytyk tsehe. Sesus soho ty nisispirikpoko iwaze mekybotu niparakzo. Aibatohi Pauro sakyriukanikitsa hurukwy eze niapykyryk. Sesus soho kytsa nisispirikpoko iwatsahi kytsa sakyriukanikitsa hurukwy zioқтыhyryk anaeze hi Epeso ezeiksa bo ziwatahaka, Deus soho ty nisispirikpoko. Deus hyrikoso ituk niapykyryk iwatahi Deus harere ziwatahaka, abaka katsa kino niwatihi iwatahaha humo tanymyryky.

1 ¹Uta Pauro. Deus zikwatawy iykzoho my ikiahatsa Epeso ezeiksa bo piwatahaka. Ikiahatsa Sesus Kiristu harere bo hỹ tsimykaranaha iwatsahi ahaspirikporëtsa. Tubabatu Deus kape niy:

— Ikia myzubahatsa bo tsimy. Wasaniha ty sibo tytsasoko — niy.
Yh̃y iky.

²Uta tihi:

— O Deus myzo. Sesus Kiristu mypehakatsa my h̃y. Ikiahatsa Epeso ezeiksa bo tysisapywyky. Ahahumo sakurëtsa moziknaha h̃y — my. Iwa Deus bo ahatsyhyryze ikpamykysoko h̃y.

Kiristu humo Deus mymysapywyikik.

³Kyze katsakta Deus Sesus Kiristuzo bo tsimypamykysoziukunahaktsa kytsa! Atahi isapyrënikia ty mybo nyny niy. Atahi ihyrikoso mybo zipaha atakta mytuk mynapykyryk h̃y. Iwatsahi katsa:

— O Deus ikia zuba tsamysapyrëta. Ikia amysakihikynikita ahumo ka mykurëtsa — tsimykaranaha. ⁴Deus mybarawy nizukni. Isuknihybyze katsa ityryktsa nimywatawy. Nawa Sesus Kiristu tuk nimywatawy. Tubabatu katsa mysapyrëtsa nimysukni tsihikik iwatahi nimywatawy. Deus tatyryktsa bete nimysukni iwa nizihikik asaktsa pisapywyikiknaha iwatahi Kiristu nimywatawy.

Tapara myhyrytykyhybyri eze myhumo tsimypokzitsiarëta. ⁵Atahi nimysukniwy iwatsahi ihyrytsa babatsa tsimoziknaha. Sesus Kiristu mymytsumuëh̃i naha humo hi tsihyrinymyrëta iwaze ihyrytsa babatsa tsimoziknaha iwa niyzihikik. Katsakta ihyrytsa babatsa tsimoziknaha iwa tatu tuka nikara. ⁶Iwaze Deus bo tsimysakibazikiknahaktsa!

— O Deus myzo ikia myhumo ka tsamypokzitsiarêta. Iwatahi Sesus mybo zipeha mymytsumuêhĩ, iwaze mybarawy ezektsa bo inasik mywata niyzik. Ikia zuba tsamysapyrêta. Batu aty tohi ikia wata. Katsa tymamsapywyikik batu ihuakbaratu tsimyzihikik iwatsahi ahumo mykurêtsa. Ikia wasani hỹ — tsimykaranaha.

⁷Deus tse babata myhumo tsimypokzitsiarêta ituk hi tsimynapykyknaha. Iwatsahi mykurêtsa. Atahi mysapyzekenihirikosokda. Kytsa iharapatawyhyta humo zihyriziknaha iwaze zibezenaha. Iwaze Deus bo mymyoktyhyryk. Nihirikosokdaze imysapybara ty tsikykaranaha ana humo hi Deus nimyokzohik ihumo nispiriktsokda. Hawa batu imysapy tsimykaranaha abaka batu mykparawy. Deus tse humo mymysapywyikik. ⁸Iharere baba ana kino mybo nitsasoko ana humo hi hỹ tsimykaranaha iwatsahi myspirikporêtsa.

⁹⁻¹⁰Iharere Sesus soho tisapyrêna hỹ. Tubabatu Deus tihi:

— O Kiristu zipehata sizubarêtsa pehatsa mozik. Nanabyitaba abazubata mozik. Bijoikpe ezektsa mybarawy ezektsa kino niwatihi iharere bo zuba hỹ mynakaranaha — niy. Abaka iharere tsinymyrynaha. Iharere mybo motsasoko. Nawa puruze piwatawy iharere Kiristu soho wasani my iwa botu nikara. Aba atsatu mybo motsasoko.

¹¹⁻¹²Tapara katsakta Sudeutsa tsimaha Kiristu taperyikik. Atahi Deus bo mymyoktyhyryk ata hi taperyky. Tubabatu Deus nimywatawy, Kiristu harere bo hỹ tsimaha iwatsahi myspirikporêtsa tsimoziknaha anahi nizihikik. Mysapyrêtsa tsimoziknaha niyzihikik. Iwaze kytsa sizubarêtsa tihi:

— O Deus ikia zuba tsamysapyrêta myzubatsa atyryktsa moziknaha. Simysapyrêtsa moziknaha iwatahi tsamysapyrêta — mykaranaha. Katsakta Kiristu humo wasani tsimykaranaha ana humo hi sihyrinymyrêtsa iwaze Deus bo motsasoziukunaha. Hawa Deus motsaso atsatu mykara. Iwatsahi Sesus Kiristu harere bo hỹ tsimykaranaha hỹ.

¹³Ikiyahatsa Sudeutsabyitsa mytuk mykaranaha. Ikiyahatsa niwatihi Kiristu tuk tsimynapykyknaha hỹ. Deus wasaniha humo mymyoktyhyryk ana soho botu tsiwabynaha iwatsahi iharere bo hỹ tsimykaranaha. Sesus Kiristu humo tsikspirikponahaze Deus hyrikoso ahabo zipeha. Ihyrikoso ahatuk mynapykyryk.

Kytsa tahanamy humo tahanaro ziwatahakanaha iwaze ustsya kytsa sinamy pinynahaze ana humo hi sihyrinymyrêtsa. Ana wa hi Kiristu harere humo Deus hyrikoso ahabo zipeha iwaze ityryktsa tsimoziknaha ana humo hi ahahtsinymyrêtsa hỹ. ¹⁴Deus hyrikoso mytuk mynapykyryk bykyze Deus isapyrênikia ty mybo nyny my. Sesus tuktsa myzubarêtsa bo Deus isapyrênikia ty botu ziperykynaha ana kino mybo nyny my. Iwa botu nitsaso. Iharere wasani my. Ana kino tsinymyrynaha. Deus hyrikoso

mybo zipaha iwa iharere soho tsinymyrykynaha. Imysapybyikia ty batu mykparawy iwaze isapyrēnikia ty zuba mybo nyny my nawa botu nitsaso atsatu my. Iwatsahi katsaktsa:

— O Deus myzo ikia zuba tsamysapyrēta. Ikie zuba tsapunihkrēta — tsimykaranaha hỹ.

Pauro Epeso ezektsa tsyhyryze Deus bo nipamykysoko.

¹⁵Kyze kytsa ahasoho kabo nitsasokonaha. Siharere tsapyrēna. Asahi: — O Epeso ezektsa Sesus harere bo hyỹ mykaranaha iwatsahi sispirikporētsa maha. Tyhapedokzitsikinaha — nikaranaha.

¹⁶Ana humo ziwabyze ahatsyhyryze Deus bo mopamykysoko. Deus pahasapywy tsihikik ibo hi mopamykyso. Kakurēta ibo mopamykysoikik utahi:

¹⁷— O Deus myzo. Sesus Kiristu mypehakatsa my. Ikie Sesus Kiristu pehatsa tsimy. Myzo ikia zuba tsamysapyrēnikita. Epeso ezektsa tysitsumuēhikta! Hawa ja mozurukunaha tsihyrinymyryky. Siharinyrētsa zeka ahumo sispirikporētsa, ana humo kino myzapykyky. ¹⁸Ikie isapyrēnikia ty sibo nyny tsimy. Sesus tuktsa sizubarētsa isapyrēnikia ty sibo nyny tsimy. Iwa botu tsiktsaso. Myzo isapyrēnikia ty tsipiperykynaha. Tsipiperykynahaze tymytsumuēhikta myzo, tsimaha.

¹⁹⁻²⁰Ikie zuba tsapunihkrēta ba hawa tohi zasukninaha. Kiristu nihyrikosokdaze ikia hi tsikzihyrizikpowyhykzo. Ikie humo bijoikpe bo nido abaze apanuryk taba modyhyky. Ikie tuk kytsa mysipehaka. Azikwy ty Epeso ezektsa Sesus tuktsa sisopyk azikwy tuk mozurukunaha.

²¹Atakta abazubata my. Myzubatsa iharere bo hyỹ mykaranaha. Bijoikpe iknyktsa iharere bo hyỹ mykaranaha. Hyrikoso sapybara wakatsa kino iharere bo yhỹ mykaranaha. Mybarawy ezektsa pehatsa sizubarētsa iharere bo hyỹ mykaranaha. Atahi abazubata tsizikwyrēta hỹ. ²²⁻²³Sesus Kiristu hi mybarawy ezektsa iharere bo hyỹ mykaranaha. Atakta koikny bakta tu batu amy tohi mykara iwatahi tsihyrinymyryta hỹ. Ihyrikoso nanabyitaba my. Ihyrikoso mytuk mynapykyryk. Iwatahi Sesus Kiristu mype niy:

“Ikiahatsa kanury wata” niy. Hawa kytsa tahanury nisipehakanaha nawa Sesus Kiristu ituktsa mysipehaka. Ikie Sesus Kiristu tuktsa humo tsamypokzitsiukrēta. Iwaze ikia Sesus Kiristu humo tsimymysapywyikik myzo — my. Iwa ahatsyhyryze Deus bo mopamykysoko.

Kiristu humo mspirikporētsa tsimoziknaha.

2 ¹Tapara ikiahatsa ahamysapybyitsa tsikykaranaha iwaze Deus okzeka batu ahaspirikpo iwatsahi siakbatsa watsa tsikykaranaha. Deus harere bo batu hỹ tsikaha. Hawa siakbatsa sityryk niakba naha tsa wa. Iwa

batu ahaspirikpo. Deus zahasapywyky ihumo mekywa tu tsimoziknaha ihumo mekywa tu tsimyzurukunaha. ²Taparaka sispirikpobyitsa harere bo yh̄y tsikykaranaha. Asaktsa Satanans hyrikoso sapybara pehatsa harere piwabyziukunaha siharere bo kino yh̄y tsikykaranaha. Satanans bijoikpe ikny mybarawy bo izumu anaeze mozuruku. ³Katsa Sudeutsa niwatihi ahawatsa zikzurukunaha. Mysapybyitsa tsikykaranaha, hawa mytsaty tsikykaranaha ana kino mysopyk. Taha bo zuba ziknakaranaha. Katsaktsa wasani tsimaha mytsaty ahabyitsa tsikykaranaha iwa mypetu mysopyk. Deus mype niy:

— Ikiahatsa Sudeutsa ustsá kytsa watsa tsimaha, kaokzeka batu ahamysapy tsimaha. Sinini ykarawy bo pahapehahik — niy.

⁴Deus hiba myhumo tsimypokzitsiarêta. Katsaktsa iharere bo ma mysopyk byitsa tu iwatatu myhumo imysapyrêta mymysapywy tsihikik h̄y. ⁵Katsaktsa tsikyhyrikosokdanahaze iwaze mspitu tsikyzykzonaha tsawatsa. Katsaktsa mysapybyitsa tsikykaranaha iwaze siakbatsa watsa Deus inamyhyrizikpowyhykzo. Sesus wata inamyhyrizikpowyhykzo iwatsahi iharere bo zuba hȳy tsimykaranaha. Iharere zuba mykparawy iwa hawa Deus mozihikik katsa kino niwatihi tsimyzihikiknaha. Ana humo niyze mynamy batu ziakse. Batu amy tohi ty zihuaknaha. Atahi myhumo tsimypokzitsiarêta babata iwa niy.

⁶Deus Kiristu zihyryzikpowyze jobo bijoikpe bo nido. Anaeze ituk tawahi mynapykyryk. Katsa kino niwatihi iharere bo hȳy tsimykaranahaze isoho bo mytsaty tsimykaranaha. Botu Sesus Kiristu tuk tsimynapykyryknaha, mybarawy ezektsa Deus hyrikoso botu namykse iwatsahi ituk tsinapykyryknaha h̄y. ⁷Deus myhumo tsimypokzitsiarêta iwatahi Kiristu Sesus nimytsumuêh̄ikĩ. Nimytsumuêh̄ize hawa Deus mozihikik ziwatawyky. Isapyrênikia mybo pinyiny tsihikik ana hi tsinymyrykynaha. Ustsá kytsa mysoho tihi:

— Hawa Deus mysisapywyky — mykaranaha.

⁸Deus myhumo tsimypokzitsiarêta iwatahi mymysapywyky. Sesus izumuze tazo bo mymyoktyhyryk niy. Katsa zuba zeka Deus bo ba zikumunaha. Iwatahi Deus myzo Sesus zipedahik atahi Deus bo mymyoktyhyryk ihumo zuba Deus tyryktsa tsimoziknaha h̄y. Katsa ibo batu amy tohi ihuak ty nyny zikaha. Deus zuba isapyrênikia ty zuba mybo nyny niy.

⁹Katsaktsa Deus tyryktsa tsimoziknaha. Deus hi tatyryktsa nimysukniwy iwatsahi katsa batu tyso.

— O mysapyrêtsa iwatsahi Deus tyryktsa tsimoziknaha — tsimaha. Iwa batu aty tohi tyso. Deus zuba katsa ityryktsa nimysukniwy Sesus humo Deus bo mymyoktyryk my. ¹⁰Abaka Deus tyryktsa tsimaha mekywa tu tsimoziknaha. Sesus Kiristu harere bo hȳy tsimykaranaha iwatsahi ihumo mspirikporêtsa mekywa tu tsimyzurukunaha. Sesus tuktsa sizubarêtsa ihumo simysapyrêtsa moziknaha. Tubabatu Deus tihi:

— O katyryktsa Sesus Kiristu watsa mozurukunahaze ana kino mozihihik. Utsa kytsa mysitsumuēhīnaha iwa mozurukunaha hỹ — niy. Iwaze mymytsumuēhīnaha nawa kytsa bo mozihihik atsa tu mymytsumuēhīkīnaha hỹ.

Parakbaha Deus tyryktsa tsimoziknaha.

¹¹⁻¹²Tapara ahaspirikpobyitsa zikzurukunaha. Ana bo mytsatytaha Kiristu harere bo batu hỹ tsikaha isoho humo batu ahaspirikpo. Ikiahatsa Sudeutsabyitsa tsimaha. Ahanury humo iwatawyhybyitsa Deus wasania ty batu ahawabyhy. Sudeutsabyitsa tu batu Isareu tsekokatsa ka. Bipyritsa tsikaha. Deus wasania ty Sudeutsa ziperykynaha ana kino batu ahawabyhy iwatsahi hawa tisapyrēna batu mytsaty tsikykarana. Deus kytsa mysitsumuēhī tsihikik ana humo hi batu ahahyrinymyry.

¹³Abaka meky watu tsimaha. Wasani tsimykarana. Sesus Kiristu iharapatawyhyta humo zihyrizikiknaha iwaze zibezenaha. Mysapyzky nihyrikosokdaze Deus bo mymyoktyhyryk niy. Katsa ihumo myspirikporētsa tsikyziknaha iwaze Deus bo mymoktyhyryk. Iwatsahi ahape mysopyk mytukytsa tsimykarana. Batu bipyritsaka tsimaha. Myzubarētsa iharere bo zuba hỹ tsimykarana.

¹⁴Taparaka katsa sisukyrytsitsa abaka myzubarētsa Kiristu harere bo hỹ tsimykarana iwatsahi taharapepokzitsikinaha. Sudeutsa, Sudeutsabyitsa kino niwatihi ihumo myspirikporētsa iwaze myharereziuwytza tsimoziknaha. Taparaka metutu ziknakarana ipokpedawy waha abaka ihumo nihokda. Katsaksa ikiahatsa kino niwatihi Deus tyryktsa tsimaha.

¹⁵Tubabatu Deus harere Moises bo nitsaso. Anaharere Moises ziwatahaka. Sudeutsa anaharere tsizubarēna bo yhỹ ziknakarana. Tsihokdaha. Anaharere bo yhỹ nikaranahaze simysapybyitsa nikaranahaze iwaze Deus nisiokzohik. Anaharere humo hi yhỹ nikaranahaze batu zikaha. Abaka Deus harere ezytyk wasani iwaze iokzeka mysapyrētsa tsimoziknaha. Kiristu myzubaha sapyzky nihyrikosokda iwatsahi ihumo mekywa tu tsimoziknaha. Sudeutsa, Sudeutsabyitsa kino niwatihi abaka atsaezubaha tsimyzurukunaha. Iharere bo zuba yhỹ tsimykarana iwatsahi taharapepokzitsikinaha hỹ. Iwa Deus okzeka mysapyrētsa tsimoziknaha. Katsa ikiahatsa kino niwatihi Deus tyryktsa tsimaha.

¹⁶Kiristu iharapatawyhyta humo zihyriziknahaze nihyrikosokda kytsa sizubarētsa sapyzky nihyrikosokda iwaze Deus simysapybyitsa nikaranahaze nisiokzohik. Abaka Deus Sesus tuktsa bo mysisapywyky. Asaktsa Sudeutsa, Sudeutsabyitsa kino niwatihi Sesus tuktsa sizubarētsa mysisapywyky. Ihumo myspirikporētsa Sesus harere bo zuba hỹ tsimykarana iwatsahi batu mysukyrytsitsa tsimaha. Ihumo

taharapepokzitsikinaha, Sudeutsa Sudeutsabyitsa kino niwatihi, abaka atsaesubaha ityryktsa tsimaha.

¹⁷Sesus Kiristu mybarawy bo inasik iwaze Deus wasania ty tsiwabynaha. Tapara ikiahatsa Sudeutsabyitsa Deus harere batu ahahyrinymyry abaka Deus wasania ty tsiwabynaha iwatsahi ahakurêtsa. Katsaktsa niwatihi tapara Deus harere Moises ziwatahaka ana humo hi myhyrinymyrêtsa. Abaka Deus wasania ty tsiwabynaha iwatsahi mykurêtsa. Deus Sesus humo batu iakyri, myhumo batu iakyri iwa ityryktsa tsimoziknaha. Deus Sesus tuktsa sizubarêtsa mysisapywyky batu iakyri. ¹⁸Kiristu mysapyzekenihirikosokda iwatsahi mykurêtsa Deus myzo okzeka mysapyzekeniyzik. Ihyrikoso mybo natasapy. Sesus humo mspirikporêtsa iwatsahi Deus bo tsimypamykysonahaze myharere piwabyky.

¹⁹Iwaze ahakurêtsa tsimoziknaha. Abaka Deus tyryktsa tsimaha. Ikiahatsa taparaka bipyritsa abaka batu, Deus tyryktsa tsimoziknaha. Deus hyrytsa tsimaha.

²⁰Ikiahatsa Sesus Kiristu mypehakatsa tuktsa tsimaha. Katsaktsa Deus ykzohotsa wasania ty ahabo tsinatsasokonaha iwatsahi Sesus humo ahaspirikporêtsa tsimaha. Deus sohokotsa niwatihi siharere bo hyÿ tsimykaranaha. Ikiahatsa Sesus humo ahaspirikporêtsa iwatsahi katsaktsa mysopyk mytuk kytsa tsimaha. Hawa kytsa wahoro mozoknikinahaha haraharetsa mysizozokonahaze kywa anawahi myharere Deus sohotsa sihyrinymyrykytsa kino niwatihi Sesus tuktsa siharere bo hyÿ mykaranahaze Deus tyryktsa moziknaha. Hawa kytsa wahoro mozoknikinahaze tapara harahare tsiziurêta zik mahaze ustsaharaharetsa ty ibaze zozo mykaranaha wa. Ata harahare tsiziurêta humo ustsaharaharetsa buruhuwa babatu zozozo mykaranaha. Sesus Kiristu hi harahare tsiziurêta wata atakta tapara piziknahaze tawata iwaze ituktsa haraharetsa watsa ihumo buruhuwa zozozo mykaranaha iwaze Deus tyryktsa tsimoziknaha. Sesus Kiristu humo atahi myhyrizikwanita.

²¹Hawa kytsa haraharetsa iharahorokwytsa ty, hwitsa iwa wahoro humo zozozo mykaranaha ana waha Deus Sudeutsa, Sudeutsabyitsa kino niwatihi kytsa sizubarêtsa ityryktsa moziknaha.

²²Tapara Deus wahoro zubata anaeze ziknapykyryk. Abaka Sudeutsa, Sudeutsabyitsa sizubarêtsa situk mynapykyryk. Deus hyrikoso situk mynapykyryk iwatsahi sizubarêtsa Sesus harere bo hyÿ mykaranaha ihumo sspirikporêtsa moziknaha, situk mynapykyryk. Iwahoro zubata wata my. Ikiahatsa Sesus harere bo hyÿ tsimykaranaha ihumo ahaspirikporêtsa tsimoziknaha iwaze ahasopyk mytukytsa. Deus hyrikoso mytuk atsaesubaha mynapykyryk katsa Deus wahoro zubata watsa tsimaha.

Pauro Sudeutsabyitsa bo tarabaja nikara.

3 ¹Iwaze uta Pauro ahatsyhyryze Deus bo mopamykysoikik. Ikiyahatsa Sudeutsabyitsa ahahumo kamypokzitsiarêta. Deus wasania ty ahabo iktsasoko iwatahi kytsa katsipa humo zikoktyhyryknaha, siakryiukrênikitsa hurukwy bo zikoktyhyryknaha. ²Deus imysapyrênikita my wasania ty ahabo zikpehahik ana soho botu ziwatahaka. Ana kino kok tsiwabynaha. ³Tubabatu Deus tihi:

— O tapara Sudeutsa zuba katyryktsa abaka kytsa Sudeutsabyitsa kino niwatihi katyryktsa moziknaha mysitsihikik — niy. Ana harere humo hi batu kahyrinymyry. Batu aty tohi hawa nizihikikze batu ihyrinymyry. Kyze Deus kape niy:

— Pauro Sudeutsabyitsa bokta! Wasaniha ty sibo tytsasokta! Asahi katyryktsa moziknaha mozihikik, iwatahi sibo papeha my — niy.

⁴Hyÿ iky. Deus soho kabo nitsasoko ana soho humo hi ahabo tsikaeni zuba botu ziwatahaka.

⁵Deus Sudeutsabyitsa soho mozihikik kytsa batu sihyrinymyry. Aba zuba Deus ykzohotsa bo, isohotsitsa iwatsa taharere soho ihyrikoso humo nisihyrinymyryky hÿ. ⁶Sudeutsabyitsa tu Deus wasania ty Sesus harere bo yhÿ mykaranaha zeka Sudeutsa atsatu maha. Sudeutsa sisopyk mytukytsa maha. Deus isapyrênikia ty Sudeutsa bo botu nitsasoko, ana kino Sudeutsabyitsa bo niwatihi mysisapywyky. Iwaze Sudeutsa, Sudeutsabyitsa niwatihi asahi sizubarêtsa Sesus harere bo hyÿ mykaranaha ihumo sispirikporêtsa astsa watsatu maha sibo hi Deus mysisapywyky hÿ.

⁷Deus wasania ty Sesus soho motsasoikik nawa kahyrikiztsokzawy my. Utakta Deus tsyhyryze tarabaja mykara. Kahyrikiztsokzawy humo ziktsumuêhikî. Izikwy humo zuba tarabajaziu mykara, Deus kahumo tsimypokzitsiarêta iwatahi zikpeha kytsa sizubarêtsa bo wasania ty motsasoko.

⁸Taparaka uta kamysapybyita tu ziknakara abaka mahani. Sesus tuktsa simysapyrêtsa maha. Taparaka Sesus tuktsa humo kakyirirêta ziknakara. Deus hi kahumo tsimypokzitsiarêta iwatahi zikwatawy. Sudeutsabyitsa bo zikpeha iwaze wasania ty sibo motsasokoro. Kiristu koikny baktatu hawa tisapyrêna ituk zuba mynakara, ana soho humo batu myhyrinymyry. Abaka Deus harere wasania ty motsasoko. Kiristu isapyrênikia ty myhyrinymyrêtsa anahumo hi Deus zikpeha.

⁹Tapara Deus mybaratsa harere ty batu tyso. Aiba zuba tsasohowy kytsa sizubarêtsa bo msihyrinymyry tsihikik iwatahi zikpeha. Iharere motsaso ana humo hi zikpeha. ¹⁰Iwa niy. Deus hyrinymyrywy baba ty myzubaha bo motsaso tsihikik. Sizubarêtsa bo ihyrinymyrywy baba motsaso tsihikik. Bijoikpe iknytsitsa sitsumuêhîtsitsa sibo motsaso

tshihikik. Hyrikoso sapybara watsa niwatihi sibo motsaso tshihikik. Abazubatsa Sesus tuktsa bo iktsa mynakaranahaze Deus soho humo sihyrinymyrëtsa. Sesus tuktsa sisapyrëtsa moziknaha iwaze sizubarëtsa Deus hyrinymyrywy baba humo sihyrinymyrëtsa hÿ. Sesus harere bo hyÿ tsimykaranaha sibo Deus hyrinymyrywy baba motsasokonaha.

¹¹Hawa Deus mytsaty nikara, atsatu wasani mykara. Abaka Sesus Kiristu harere bo hyÿ tsimykaranaha zeka Deus hyrytsa tsmoziknaha, Deus sohowy atsatu wasani my. Iwaze ihyrinymyrywy baba atsaesubaha bo ziwatawy.

¹²Iwaze mypëhakatsa harere bo hyÿ tsimykaranaha iwa tsimyzurukunaha. Abaka batu mypyby. Iwatsahi Deus bo tsimypamykysoikiknaha. Atahi mymywabyky. Atahi mymykusukniki. Ibo hyÿ tsimykaranaha iwatsahi myspirikporëtsa abaka batu mypyby.

¹³Iwatsahi ahakurëtsaktsa! Kaharere tsiwabzyiukunahaktsa! Deus wasania ty ahabo iktsasoko iwatsahi kytsa piksukyrykynaha. Kahumo ahasukatsihik byihuja! Deus pahasapywyky iwatahi kakurëta. Ahatsyhyryze sinini mykara ikiahatsa humo tisapyrëna iwatahi kakurëta my.

Hawa Kiristu myhumo tsimypokzitsiarëta.

¹⁴Iwatahi ahatsyhyryze myzo bo mopamykysoikik. ¹⁵Deus myzo koikny baktatu mynakara katsaktsa Sesus tuktsa ihyrytsa tsimaha. Asahi myzubaha bijoikpe eze tu mybarawy ezektsa kino niwatihi ihumo sispitu maha. Myzubarëtsa ihyrytsa tsimaha hÿ. ¹⁶Ahatsyhyryze ipe my:

— O myzo ikia zuba tsapunihikrëta. Azikwy tisapyrëna. Ahyrikoso Epeso ezektsa tuk mynapykyryk asa kino ihumo sipunihikrëtsa moziknaha.

¹⁷⁻¹⁸O myzo tysitsumuëhikta. Iwa tsimykaraze aharere bo hyÿ mykaranaha, iwa Sesus situk mynapykyryk ana kino myzapykyky. Hawa hwi puëtsikbyita iharatatsa zihiboani iwatahi ba ziknatsihipetok. O myzo Epeso ezektsa Sesus tuktsa ikia humo sipunihikrëtsa moziknaha. Iwa hwi iharatatsa zihiboani watsa asaktsa Sesus harere bo hyÿ mykaranaha ikia humo sipunihikrëtsa moziknaha. Iwaze asaktsa batu tyso Sesus myhumo tsimypokzitsiarëta ja. Batu mynyhy. Iwa batu tyso. Sesus myhumo tsimypokzitsiarëta ana kino myhyrinymyrëtsa maha hÿ. Sispirikporëtsa tybyi zubataha.

O myzo Sesus tuktsa myzubarëtsa ahumo tsihyrinymyrytohikta! Kiristu myhumo tsimypokzitsiarëta hÿ ana humo kino tsihyrinymyrytohikta. Sesus mymypokzitsiki ba zipyk tawahi myhumo tsimypokzitsiarëta. Ana kino sihyrinymyrëtsa hÿ ana humo hi mozihikik. Iwa batu aty tohi hawa Sesus myhumo tsimypokzitsiarëta tsihyrinymyrëta babata.

¹⁹O kazo isapyrēnikia ty sibo tsinyny tsihikik ana kino botu tsiktsaso. Aharere isapyrēnikia soho atsatu wasani sityshyryze myzapykyky — my. Iwa Deus myzo bo ahatsyhyryze mopamykysoko.

²⁰O Epeso ezektsa Sesus tuktsa Deus bo tsimysakibazikiknahaktsa! Ipe tsimaha:

— O myzo ahyrikoso mytuk mynapykyryk hỹ. Iwaze ahyrikoso humo azikwy mytuk mynapykyryk iwatsahi mykurētsa hỹ. Ikia zuba tsamysapyrēta. Ikia zuba apunihikrēnikita. Ikia zuba amysakihikynikita. Hawa abo tsimyzapykykynahaze Sesus humo yhỹ tsimy kara. Hawa mytsaty tsimykarannahaze ana humo hi tsihyrinymyrēta. Katsa tsimyzapykytohinahaze mymytsumuēhĩki azikwy tisapyrēna hỹ.

²¹O myzo katsaktsa Sesus tuktsa ikia bo mywahi tsimysakibazikiknaha. Sesus Kiristu mymysapywyky iwatsahi atuk mywahi tsinapykyryknaha hỹ. Yhỹ tsimaha — iwa myzo bo tsiksakibazikiknaha hỹ.

Sesus tuktsa atsatu ty mytsaty mykarannaha.

4 ¹Utakta Sesus soho iksasoikik naha humo siakryiurēnikitsa hurukwy bo zikoktyhyryknaha.

O kytsa kaharere bo wabyziutaha! Deus hi zahawatawy iwatsahi ihyrytsa tsimoziknaha iwaze wasani tahaktsa! ²Katsa zuba myhyrinymyrētsa batu ahasopyk. Ahahokani byrihuja. Ahakubyrisorokuja! Batu ahabo zuba tsimykarannaha tyharape pokzitsikinahaktsa!

³Myzo hyrikoso mymysapywyky iwatsahi mykurētsa tsimykarannaha. Katsaktsa atsa botu mytsaty tsimykarannaha iwatsahi aharape hahokbyitsa abaka tyharape pokzitsinaha. Ahape tu ahasopyk:

— Utakta Sesus tuktsa mysisapybaka. Yhỹ wasani mysisapy tsihikik — my. Iwa Deus myhumo mozihikik.

⁴Myzo nimywatawy iwatsahi ituk mywahi tsimynapykyryknaha. Nimywatawyze Sesus humo myspirikporētsa tsimoziknaha, iwaze Deus hyrytsa tsimoziknaha. Kiristu harere bo zuba hyỹ tsimykarannaha iwa tsimyzurukunaha. Deus hyrikoso estuba zubata atahi mytuk mynapykyryk. Deus hyrikoso estuba zubata atahi mytuk mynapykyk zeka Kiristu nury estuba zubata tsimaha. Iwatahi kytsa Kiristu tuktsa soho:

— Asaktsa Sesus nury maha — my. ⁵Sesus Kiristu mypehakatsa atazubata my. Astatu mymyoktyrykta my. Kytsa nimyharasusuhiknahaze Sesus Kiristu mektsa botu nisiwatawy.

⁶Deus zuba koikny baktatu atazubata my. Atahi mypehakatsa. Izikwy mytuk mynapykyryk iwa mymytsumuēhĩki. Atahi tawahi mytuk mynapykyryk hỹ.

⁷Kiristu myhyriziktsokzawy humo nimywatawy ana humo hi mymytsumuēhĩki. ⁸Tubabatu Kiristu mybarawy bo izumuze Deus sohokotsa botu ziwatahaka:

— Bijoikpe bo ziksizoze tasukyrytsitsa nisioktyhyryk.
 Ipunihikrēnikita tu tasukyrytsitsa sizubarētsa tatuk
 nisioktyhyryk.

Abaka iharere bo zuba yh̄y nikaranaha.

Iwaze bijoikpe bo ziksizoze isapyrēnikia ty tatuktsa bo nyny my
 — niy.

Iwa botu ziwatahaka, aba zuba wasani my.

⁹Hawa Kiristu nidoze Deus sohokotsa ziwatahaka. Tapara Kiristu mybarawy bo inasik iwaze nido. ¹⁰Atakta Sesus bijoikpe ikny mybarawy bo inasik astatu bijoikpe bo nido. Nanabyitaba mypehakatsa myhyrizikwani mozik. Mypehatsa abazubata iwaze ihumo mybarawy tisapyrēna mozik. ¹¹Atakta Kiristu wastuhu kytsa nisiwatawy. Ispe niy:

— Ikiahatsa kakzohotsa tsimaha iwatsahi Deus wasania ty tytsasonaha kytsa tysihrinymyry — niy.

Kytsa Sesus humo sispirikpobyitsa bo Deus wasania ty motsasonaha. Iwa Deus tuk mynapykyknaha iharere humo sispirikporētsa moziknaha. Nanabyitaba Deus wasania ty tsimysasonaha.

Utsa kytsa nisiwatawy. Ispe niy:

— Ikiahatsa Deus sohokotsitsa kaharere Sesus tuktsa bo tytsasokonaha — niy.

Utsa kytsa niwatihi nisiwatawy. Ispe niy:

— Ikiahatsa wasania ty ziknapamykysokonahatsa tsimaha.

Nanabyitaba sizubarētsa bo wasania ty tsimysasonaha — niy. Utsa kytsa niwatihi nisiwatawy ispe niy:

— Ikiahatsa tsinymyrykynahatsa Sesus tuktsa tysihrinymyry.

Tysisapywykynaha sihumo tynasipokzitsikinaha — niy. Iwa my. ¹²Iwaze tyharape pokzitsikinaha. Siharere humo utsa Sesus tuktsa tynasitsumuēh̄i tsihikiknaha. ¹³Katsakta Kiristu watsa tsimoziknaha, ana hi Kiristu mozihikik. Hawa tisapyrēna my Kiristu mykara. Kyze mopyk tsawa ihumo myhrinymyrētsa. Katsakta astatu tsawatsa mytsaty tsimykaranaha. Deus tse Kiristu isapyrēnikia soho humo myhrinymyrētsa h̄y. Iwaze katsakta utsa Sesus tuktsa niwatihi atsaesubaha iwata tsimoziknaha h̄y.

¹⁴Kyze Kiristu humo myspirikporētsa tsimykaranaha iwatsahi iharere humo myhrinymyrētsa. Ihrinymyrywy baba humo myhrinymyrētsa. Utsa mymispihikbatakanaha zeka batu waby tsimaha. Utsa mybarapetu mykaranaha zeka siharere humo hi batu h̄y tsimaha. Katsakta jabyitsa sopykbyitsa asahi paikpa mytsaty mynakananaha. Katsakta Deus harere bo zuba hȳy tsimykaranaha. ¹⁵Ihrinymyrywy baba humo zuba yh̄y tsimykaranaha. Iwa tyharape pokzitsikinaha. Sesus myharek wata tsimaha. Iwaze katsa wasanitsa tsimoziknaha.

¹⁶Sesus Kiristu myhumo tsimypokzitsiarēta iwatahi mybo tawahi myzisapywyky. Parakbaha mysitsumuēh̄iekik. Iwatsahi katsakta niwatihi

ustsa bo tahatsumuẽhĩnahaktsa! Katsaktsa inury tsimaha. Myni mypoiktsa humo pyryk pyryk mahaze kyik rikto maha. Myni byizeka batu kyik rikto zikaha. Anawata Sesus tuktsa estuba estuba zubata tahahyriziktsokzawy tsimykaranaha iwaze katsaktsa Sesus harere bo hyỹ tsimykaranaha ihumo myspirikporẽtsa tsimoziknaha. Kytsa simysapyrẽtsa moziknaha myharere humo iwa tahatsumuẽhĩnaha hỹ. Iwatsahi taharapepokzitsinahaktsa!

**Hawa Kiristu harere bo hyỹ tsimykaranaha ihumo
myspirikporẽtsa, meky watu tsimoziknaha.**

¹⁷O katukytsa kaharere bo wabyziutaha! Mypehatsa Sesus harere ahape my. Kytsa Deus soho humo sispirikpobyitsa watsa batu ahasopyk. Asahi paikpa mytsaty nikaranaha kytsa harere humo zuba yhỹ mykaranaha. Ikiahatsa batu. Niwazubaktsa. Siwatsa batu hỹ zikaha.

¹⁸Asaktsa Deus harere bo batu hỹ niaha, iwatsahi batu sihyrinymyry. Batu ma zikaha Deus hyrinymyrywy baba humo batu sihyrinymyry iwatsahi kytsa miwa eze nizaranahatsa watsa niyziknaha.

Siharehakyrẽtsa asaktsa hawa mykaranaha batu sihyrinymyry. Deus harere humo batu sihyrinymyry, iwatsahi paikpa mytsaty mykaranaha.

¹⁹Nisikpybybyinahatsa hi ustsá bo mysisapybyrikinaha. Tsosĩ zikuikik naha tsahi ihyriziktsopyryryk izumu. Nahapewohiknaha. Sisapybyikitsa tihi nikaranaha.

²⁰Ana hi Sesus Kiristu soho humo batu ahahyrinymyry.

Ahamysapybara tsmoewynahaktsa! ²¹Kytsa Sesus Kiristu harere bo zuba hyỹ mykaranahaze simysapyrẽtsa moziknaha. Ana hi botu tsiwabynaha. Ana humo hi tsikahahyrinymyrykynaha iwaze ikiahatsa ahamysapybyitsa tsikykaranaha tsmoewynaha. Myharere tyziwabyziukunahaktsa hỹ.

²²— O katukytsa! Taparaka amy ty batu imysapybara zuba tsikzihikiknaha. ²³⁻²⁴Anabo hi wasani mytsaty ahabyitsa tsikykaranaha. “Iwa tsimaha zeka ahakurẽtsa tsimaha ahape tu ahasopyk” mybarapetu tsikykaranaha. Ana kino batu imysapy iwatsahi batu ahaku. Iwa tsikzurukunaha. Ahasopyk meky watu tsimyzurukunaha. Ahasuk ibykta mysykbaik zeka typapykik kyze ahasuk ezytyk ty korobyk tsimaha. Atawahi ahasopyk batu imysapy tsmoewynaha. Mekywa tu tsimoziknaha. Ahasopykwy ezytyk Sesus humo mytsaty tahaktsa! Sesus tuk tsimyzurukunaha! Ahasuk ezytyk ty korobyk tsimaha asa watsa tihi Sesus sopykwy humo zuba tsimyzurukunahaktsa! Iwaze wasani my tsimykaranaha. Hawa tsimyzurukunaha Kiristu wata tsimoziknaha iwa tsikahahyrinymyrykynaha hỹ — my.

Hawa Kiristu ziknakara ikia niwatihiktsa!

²⁵— O katukytsa! Taparaka ahamyspihikbatarẽtsa ziknakaranaha. Abaka ahamyspihikbata byihuktsa wasape tynakaranaha. Hawa wasani

haty zuba tsimykaranaha hỹ. Katsaktsa atsaezubaha Sesus tuktsa tsimaha ana humo hi ahamyspihikbata byrihuja.

²⁶⁻²⁷Kytsa humo ahakryri zeka niwazubakta! Haramwe junubabyizetu tynakokozonaha ahakoko byizeka Satanas harere bo yhỹ tsimykaranaha. Aty wahoro hokbowy zoksapare my zeka usta mytsuk, katsa mykoko byizeka Satanas mytuk mymykniki. Iwatsahi ahakryri byihuja.

²⁸Aty ahatuktsa tsitsyhyryboarẽta ziknakara zeka ustsá namy ty ka tyakse akse byity. Abaka tarabaja tykta. Iwaze tsipanamy ustsá kytsa bo nyny tsimy. Tsipanamyze hi wastuhu anamy ty sinamybyikitsa bo nyny tsimy.

²⁹Asaktsa ahatuktsa siharerewabymybarẽtsa tu zeka niwazubakta. Ahaharere tisapyrẽna humo zuba ustsá bo tynapamykysonaha iwaze tyharape hapokzitsikinaha. Ustsá bo tysitsumuẽhĩnaha hỹ. Iwaze kytsa ahaharere piwabynaha zeka: “O anaharere hi tisapyrẽna my” maha.

³⁰Iwa tsimyzurukunaha zeka Deus hyrikoso ahahumo tsakurẽta mynapykyryk. Imysapybara tyty tsimykaranaha zeka Deus hyrikoso ahahumo batu iaku. Deus hyrikoso zahawatawy iwatsahi Deus tyryktsa tsimoziknaha ahahyrinymyrẽtsa. Hawa Deus hyrikoso imysapyrẽnikita my ikiahatsa niwatihi ihumo ahamysapyrẽtsa tsimoziknaha. Ikiahatsa Deus hyrikoso tuk tsimynapykyknaha atahi bijoikpe bo mymyoktyhyryk. Deus ipe my:

“Hana puruze Sesus tuktsa kabo tysioktyhyk” my. Iwaze pahaoktyhyryk. Deus bo bijoikpe bo pahaoktyhyryk hỹ.

³¹Iwatsahi pykyhytutaha! Harape humo ahaty kyri kyri byitaha! Ahape ty myija myija byitaha. Ahaty betsak betsak byitaha! Aty iotutsa pauksitsa humo takyriki tsiharerewabymybarẽta mozik. Iwaze ana kino tsimoewynaha!

³²Ikiahatsa hi kytsa bo tysisapywykynahaktsa! Ahahyrizikporẽtsa tyharape pokzitsikinahaktsa! Ahamysapybyitsa tsikykaranaha Deus pahaokzohik. Sesus Kiristu humo Deus mymyokzohik ispiriktsokdatawata my. Iwatsahi ikiahatsa niwatihihiktsa. Aty batu imysapy abo my zeka ikia imysapybara ty nikara tsipiozkohik, mahani byitatu tsimyzuruku. Ikspiriktsokdatawata. Deus ahamysapybyitsa tsikykaranaha Sesus humo pahaokzohik iwatsahi ustsá imysapybara tsipiozkohik hỹ Deus wata my — my.

O myzubaha Sesus watsa tsimyzurukunaha.

5 ¹Ikiahatsa Deus hyrytsa tsimaha. Atahi ahahumo tsimypokzitsiarẽta hỹ. Iwatsahi ahamysapyrẽtsa tsimoziknaha. Hawa kytsa hyrytsa tahazotsa mysisopykzukunaha ikiahatsa Deus watsa tsimykaranaha. Ahazo watsa tsimoziknaha. ²Ustsá tysisapywykynahaktsa! Kiristu watsa tsipisapywykynahaktsa! Atahi myhumo tsimypokzitsiarẽta iwatahi

mysapyzeken nihyrikosokda. Tapara kytsa siraratsa ziknasibakanaha iwaze Deus bo ziknasiwezokonaha ana humo hi simysapybyitsa nikaranaha Deus nisiokzohik atawatsa Sesus nihyrikosokdaze mymysapybyitsa tsikykaranaha Deus ihumo nimyokzohik. Deus tihi:

— O Sesus Kiristu mybarawy ezektsa sapyzeken nihyrikosokda ta humo kakurēta. Hawa jokmorēnikia waok myze kakurēta anawahi Sesus nihyrikosokda iwatahi ibo iktsa myze kakurēta my. Mybarawy ezektsa humo tsimypokzitsiarēta babata ziwatawy — niy.

³Ikihatsa hi Deus tyryktsa tsimaha. Iwaze hawa wasani zuba tahaktsa! Kytsa ahatukze ustsá okeza bo iktsa zuba taha. Taokeza zuba mysipyryryna. Wytykyryk kino niwatihi tahabariktsa humo zuba ziktahasipihiknaha. Amy ty batu sisopyksapy wytykyryk nisiakzobyrikinaha batu mytsaty tsimykaranaha. Ahazokdi byihuja! Ahazokdibyitsa zeka mektsa namy ba zikzihikiknaha. ⁴Ikihatsa zuba wytykyryk nury soho tsimypamykysokonahaze ahamysupehe byihuja. Ahaharerewabymybarabyihu ja. Anawaze ahaharere humo ustsá kytsa bo batu mysimiywyky. Ahamykni byihuja tynapykyknaha. Wasaniha ty tsimaha zeka ikihatsa Deus pe tihi:

— O ikia zuba tsamysapyrēta. Nawa nizukni tsizubarēna tisapyrēna iwatsahi mykurētsa — tsimaha. Iwa tsimytsasokonaha. ⁵Atakta ustsá bo tahyryzikwy zeka Deus tuk batu tawahi zikakpykyk. Wytyk usta maku bo tahyryzikwy zeka atatsa katsa Deus tuk batu tawahi zikykykyk imysapybara bo mytsaty mynakanaha asahi Deus tuk batu tahawahi zikakpykyknaha. Ustsá namy tsihitsa watsa mynazihikiknaha batu Kiristu tyryktsa asahi sizokdirētsa Deus tuk batu tahawahi zikakpykyknaha.

Kiristu harere bo zuba hỹ tahaktsa kytsa!

⁶Kytsa asahi Deus harere bo batu hỹ zikaha Deus tuk batu tahawahi zikykykyknaha. Kytsa ahape naha zeka:

— O hawa tsimyzurukunaha wasani tsimaha. Iwatsatu ahamysapybyitsa tsimykaranaha zeka ikihatsa Deus tuk ahawahi tsimynapykyryknaha — mybarapetu nikaranaha. Anaharere batu wabyziu zikaha. Asaktsa mopamykysonaha zuba. ⁷Siharere bo waby waby byitaha! Deus tihi:

— Kytsa kaharere bo batu hỹ zikahaze katuk batu tawahi zikapykyryknaha — my. Iwatsahi siharere bo ka waby waby byitahaktsa.

⁸Taparaka wasaniha humo batu ahahyrynimyyry. Kiristu harere humo batu ahahyrynimyyry. Iwatsahi ahamysapybyitsa tsikykaranaha. Kytsa miwa ezektsa watsa tsikzurukunaha iwatsahi Kiristu harere bo batu hỹ tsikykaranaha. Deus harere humo batu ahahyrynimyyry hỹ. Abaka meky watu tsimykaranaha. Sesus Kiristu harere bo hỹ tsimykaranaha ihumo

meky watu ahaspirikporëtsa tsimoziknaha. Hawa kytsa iwororo haburuk tu mokurunaha ezektsa watsa tsinymyrykynaha iwatsahi imysapybara bo batu hỹ tsimykaranaha meky watu tsimoziknaha. ⁹Ikiahatsa hi Kiristu harere bo hyỹ tsimaha zeka kytsa humo tahasapywykynaha. Wasani tsimykaranaha. Kytsa bo ahaspihikbata byihuja ahaharere wasani zuba tsimykaranaha.

Iwa Kiristu harere bo hyỹ tahaktsa! ¹⁰Ahape tu ahasopyk:

— Hawa Deus mozihihik naha zuba tsimyzihihiknaha iwatsahi isopyk ty tanymyry tsihikik. Deus ykparawy humo tanymyryky — tsimaha.

¹¹Kytsa Sesus harere bo yhỹ ahabyi zeka sisopyksapybyitsa mykaranaha.

¹²Ikihatsa batu situk tsimaha. Asaktsa kytsa watsa asahi miwa eze pyrikpyrik mykaranaha kytsa papatu simysapybyitsa mykaranaha. Simysapybyitsa nikaranaha ana soho tih batu tyso. Mysikybyrëtsa simysapybyitsa nikaranaha humo. Ikiahatsa ispe tsimaha:

— O kytsa ahamysapybyitsa tsimykaranaha ana ty kino “niwazubakta” tsimaha — my.

¹³⁻¹⁴Miwaka rika ty pok mahaze kywa mypubyize mynamy bo iktsa tsimaha. Anawahi Kiristu harere kytsa bo tsimypamykysokonahaze simysapybyitsa mykaranaha anasoho humo hi sihyrinymyrëtsa. Ahaharere rika wata mozik. Iwororo ha eze kywa mypubyi mozik. Anawahahi Kiristu harere tsimytsasokonahaze kytsa simysapybyitsa nikaranaha nisihyrynimyrykynaha iwaze iharere humo simysapybyitsa nikaranaha sitsyhyryze piwatawyky. Tapara aty zeka:

— Ikiakta tsipuruziukze popotyкта kyiktyкта ikia amysapybyita tsiky kara naha humo ibezehe tawata tsimy.

Tsukahazoziknahaktsa! Kiristu harere bo zuba yhỹ tahaktsa!

Hawa kytsa iwororo ha eze kywa mokurunaha ikiahatsa siwatsa tsimaha hawa wasani tsinymyrykynaha.

Kiristu harere humo wasanitsa tsimoziknaha — nikaranaha.

Iwa botu ziwataha.

¹⁵Kaharere bo wabyziutaha! Ahape tu ahasopyk:

— O hawa haeze tsimyzurukunaha wasani ja tsimaha.

Sispirikponikitsa — tsimaha. Iwa ahasopyk. Hawa tsimyzurukunaha pykyhytu tahaktsa! ¹⁶Mybarawy ezektsa simysapybyitsa mykaranaha. Ikiahatsa batu. Mekywatu tsimoziknaha. Kytsa tysisapywykiknahaktsa! Tysitsumuëhĩnahaktsa. ¹⁷Iwatsahi mypehakatsa Sesus harere bo wabyziutahaktsa! Ahasopyksapy byihuja! Ikiahatsa hi mypehakatsa harere bo mytsatyziu tsimynakaranaha iwatsahi iharere bo zuba hyỹ tsimykaranaha.

¹⁸Tsõsi ty ka tsõ tsõ byitaha. Kytsa tsõsi ty pikukunaha zeka batu saku. Tahakyri humo sisopyksapybyitsa mykaranaha. Tsõsi humo batu imysapy mykaranaha. Ikiahatsa batu. Deus hyrikoso ahatuk mynapykyryk ana kino tuzihikiknahaktsa!

¹⁹Tsikzumubanahaze Deus bo tysakibazikiknahaktsa! Ikia zubaze kino niwatihi Deus bo tysakibazikikta! Hawa taparaktsa Deus bo nisakibazikiknaha ikiahatsa kino niwatihi tsimaha. Hawa Deus sohotsitsa nisakibazikiknaha ikiahatsa atsatu tsimaha. Deus hyrikoso humo iharere tuk tsimysakibazikiknahaktsa! ²⁰Iwaze nanabyitaba ikiahatsa Deus bo tsimysakibazikiknaha. Ikiatsa tihi:

— O Deus myzo ikia zuba amysapyrēnikita. Ikia zuba apunihikrēnikita, ikia amysakikynikita iwatsahi ikia humo ka mykurētsa tsimaha — my. Iwa Deus bo tsimypamykysokonaha h̄y.



(Epesios 5.20)

Kytsa, wytykyryk kino niwatihi tuharape pokzitsinaha.

²¹Kyze Deus harere bo yh̄y tynakaranaha. Sesus Kiristu harere bo zuba hȳy tynakaranaha iwatsahi ahaspirikporētsa tsimoziknaha. Utsa Sesus tuktsa harere bo kino niwatihi yh̄y tsimykaranaha.

²²Wytykyryk ikiahaka kino Kiristu harere bo hȳy taha. Atsawatu ahapytsa harere bo yh̄y tynakaranaha. ²³Kiristu mypehakatsa harere bo zuba hȳy tsimykaranaha. ²⁴Katsaktsa ituktsa tsimaha. Atahi myharek wata my. Katsaktsa inury watsa tsimaha. Sesus Kiristu tazo bo mymyoktyhyryk mykara. Iwatsahi iharere bo hȳy tsimykaranaha. Atsawatu wytykyryk kino ahapytsa harere bo zuba tynakaranaha iwazahi ahapytsa ahapehatsa harere bo yh̄y tynakaranaha.

²⁵Kytsa kaharere bo wabyziutaha! Ahaokeza humo ahamypokzitsiukoktsa! Tysitsumuēh̄inahaktsa! Hawa Kiristu myhumo tsimypokzitsiukoktsa ikiahatsa kino niwatihi ahaokeza tysipokzitsinaha! Kiristu myhumo tsimypokzitsiarēta

mysapyzeken nihyrikosokda. Aparakbaha bo nihyrikosokda. ²⁶Kiristu harere humo mysapyrëtsa tsimoziknaha. Kytsa momurunaha zeka siziurëtsa moziknaha. Astsatu Kiristu harere bo yhyë tsimykaranaha zeka siziurëtsa watsa tsimoziknaha. Iharere humo ahamysapyrëtsa tsimoziknaha. ²⁷Kiristu hi:

— O katuktsa katuk ahawahi tynapykyryknaha. Wasani tsimoziknaha. Ahamysapyrëtsa tsimoziknaha anawahi mozihikik — niy.

²⁸Atsawatu kytsa ahaokeza tsysipokzitsinaha. Hawa Kiristu aparakbaha humo tsimypokzitsiukrëta iwatsa kytsa ahaokeza tsysipokzitsinaha. Amy ty tsipyreña tsimyzihihikiknaha batu ahabo zuba zikaha. Isapyrënikia humo ahaokeza bo kino niwatihi tsimyzihihikiknaha.

²⁹Isapyrënikia ty ahaokeza tsyhyryze tsiberinaha niwatihi. Ikiatu tsizapokzitsiki. Araparëta zeka tsipadisaha. Arapukrëta zeka tsipuku. Iwatahi isapyrënikia ty hyryk tsimy zeka atsatu ahaokeza bo nyny tsimy.

³⁰Kiristu wata tsimoziknaha. Atahi namypokzitsihikik. Atahi:

— O katuktsa ikiahatsa kanurywatsa, iwatahi pahapokzitsihikik — my. Iwa mysopyk mykara. — Kiristu tatuktsa humo tsimypokzitsiarëta iwatahaktsa kytsa ahaokeza humo ahamypokzitsihu. ³¹Deus harere mype maku tasukzaze tazo perek taje perek my. Taparaka atazuba zikzuruku. Tasukza zeka mahani, taoke tuk mynapykyryk. ³²Kiristu tuktsa humo tsimypokzitsiukrëta ana watsa hi kytsa tahaokeza humo simypokzitsiukrëtsa. Anasoho hi piwatawyky. Tapara ana soho humo batu myhyrinomyry aba zuba tsinomyryknaha.

³³Kiristu tatuktsa humo tsimypokzitsiukrëta babata, atawahi ahaokeza tsysipokzitsinahaktsa! Tapara isapyrënikia ty ahabo zuba hyryk zikaha, abaka batu, isapyrënikia ty ahaokeza bo kino niwatihi taha. Wytykyryk ikiahaka ahapytsa harere bo yhyë tsimykaranaha hyë. Iwa tuzurukunahaktsa — niy.

Hawa sizotsa tahahyrytsa humo mysisakihikynaha.

6 ¹— O jabyitsa ahazotsa harere bo hyë tahaktsa! Siharere tsipiwabyziunaha zeka ma tsimaha. Ahajeza harere bo niwatihi hyë tahaktsa! Siharere bo ma tsimaha zeka Deus ispe my: “O asaktsa wasani mykaranaha” — my. ²⁻³Tubabatu Deus tyryktsa pe niy. — Ahazotsa harere bo hyë taha. Ahamyharerewabyrëtsa zeka aibani zuba tsimyhyrikosokdanaha — niy. Deus harere tsipyreña iwatsahi ahazotsa ahajeza kino niwatihi siharere bo ma taha. ⁴— O myzotsa ahahyrytsa humo ahahokani byrihuja ahaharere humo siakubyitsa mykaranaha. Siaku byizeka sioktsiukrëtsa moziknaha. Ikiyahatsa hi ahahyrytsa Kiristu harere humo tsihyrinomyrynaha. Iwaze Sesus sopyk wa mozurukunaha iwa ikiahatsa soho humo ahasopykwatu mykaranaha — my.

Hawa sipehatsa tahatsumuëhëtsitsa humo sisopyk.

⁵Abaka kytsa ahahyriziktsokzaharëtsa kaharere bo wabyziutaha! Ahapehakatsa pahapehanaha zeka yhyë tsimykaranaha. Sihyriziktsokzawy

soho pahapehanahaze yh̄y tsimykarana. Ahape tu ahasopyk batu tyso. — O ana hyriziktsokzawy humo batu h̄y — tsimaha. Ahahyriktsokzawy humo ahapykyhytutaha! Ahapehatsa harere bo yh̄y tsimykarana watihi Kiristu harere bo hȳy tynakaranaha. ⁶Tarabajaziu tykaranahaktsa! Ahapehatsa pahasukparana zeka tarabajaziutaha. Ahapehatsa ahaty sukpara habyzize kino niwatihi tarabajaziutaha. Kiristu tuktsa humo ahasopykziur̄etsa h̄y. Iwa Deus mozihihik ana humo hi ahasopykziur̄etsa tsimoziknaha. ⁷Ahape tu ahasopyk:

— O kahyriktsokzawy kapehatsa bo mykara. Sesus Kiristu bo kino niwatihi. Iwatahi pisapybaka — tsimaha. ⁸Sesus Kiristu mypehakatsa babata. Atakta abazubata. Mybarawy ezektsa pehakatsa babata my, atahi ihuak ty sihyriktsokzawy humo kytsa aparakbaha bo nyny my. Anabo hi mytsatyziu tahaktsa kytsa! ⁹O sipehatsa abaka ikiahatsa pe my:

— Asaktsa ahatsyhyryze ahahyriktsokzawy humo mykaranaha tsysapywykynaha. Ahampybyty byihuja. Ahasakimyskyry byihujataha. Asaktsa ahatsyhyryze tarabaja mykaranaha. Deus hyrytsa maha ikiahatsa kino niwatihi Deus hyrytsa tsimaha. Iokzeka astsabani. Iwatsahi ahakzoziuhuktsa! Myzo bijoikpe eze mybarawy ezektsa aparakbaha bo mysisapywyky. Ana humo hi ahaspiriktsokda byihuja kytsa! — my.

**Deus sodadu suk imiokbyita wata ahabo nyny my,
iwaze ahapunihikr̄etsa tsimoziknaha.**

¹⁰Aba pepykyk, kaharere ahabo motsaso pahatsumūeh̄i tsihikik. Ahapunihikr̄etsa tsimoziknaha ana humo hi pahatsumūeh̄i. Ikiahatsa Sesus Kiristu humo ahaspihikr̄etsa iwatsahi ahaspirikpor̄etsa tsimoziknaha. Atahi ipunihikr̄enikita my ba hawa tohi zikzukninaha. Iharere bo ma tsimykarana zeka izikwy ahatur mynapykyryk.

¹¹Sodadutsa pehakatsa sisuk ty mekywahaty ty sodadutsa bo nyny my. Sisuk ty imiokbyita iwatsahi sisukyrytsitsa ba ziksibanaha. Deus zikwy mytuk mynapykyryk. Iwatsahi mypunihikr̄etsa tsimoziknaha izikwy sodadutsa suk imiokbyita wata my. Katsahi:

— O myzo azikwy ty mybo nynytyny — tsimaha. Yh̄y mykara. Iwaze Satanas harere bo batu h̄y tsimaha Deus zikwy humo, Satanas pahaspikhatakaze iharere bo batu h̄y tsimaha.

¹²Mybarawy ezektsaktsa mysukyrybyitsitsa maha. Hyrikoso sapybara watsa mysukyrytsitsa maha. Sinurybyitsa tu mysukyrytsitsa babatsa maha. Hyrikoso sapybara myhumo batu siakparawy mymysukyryikiknahatsa maha. Iwatsahi siharere bo batu h̄y tsimaha. Asaktsa mysukyrytsitsa babatsa h̄y. Asahi namysapybyrikinaha. Kytsa Sesus humo sispirikpobyitsa hi siharere bo yh̄y mykaranaha. Sizubar̄etsa mysipehakanaha iwatsahi sisopyk watsa mozurukunaha. Asaktsa Sesus harere bo batu h̄y zikaha sispirikpobyitsa tu hyrikoso sapybara pehakatsa

sipehakatsa niyzik. Asaktsa unata zuba siakparawy kytsa papa tu simysapybyitsa tu nikaranaha iwaze miwa siakparawy.

¹³Iwatsahi Deus zikwyty tsimyzapykykynaha. Sodadutsa sisuk imiokbyita watsa ikiahatsa hi Deus zikwy tsimyzapykykynaha. Deus zikwy ahatuk mynapykyrykze ahapunihikrêtsa tsmoziknaha. Ahaspirikporêtsa tsmoziknaha Deus zikwy humo hyrikoso sapybara harere bo batu hỹ tsimaha.

¹⁴Mybarawy ezeiksa niwatsorokonahaze sisuk ty mekywaha tu korobyk niaha. Sisuk imiokbara ty korobyk niaha iwatsahi sisukyrytsitsa ba ziksibanaha. Ikiahatsa sodadutsa watsa tsimaha. Tapara sodadu tasukpesuk ty izezehirênikia ty korobyk niy. Tazikoikaĩwy ty haĩ niy. Ikiahatsa batu ahamyspihikbata. Wasani zuba tsimysasonaha ikiahatsa sodadu zikoikaĩwy watsa. Iwaze wasani tsimyzurukunahaze ikiahatsa sodadu suk imiokbyita ty korobyk niy tawata tsimaha. Hawa isuk imiokbyita humo ba zibezenaha, ikiahatsa wasani tsimykaranaha humo hyrikoso sapybara humo ahakyzohokbyitsa maha.

¹⁵Deus mybarawy ezeiksa humo tsimypokzitsiarêta iwaze wasania ty Sesus Kiristu soho tsimysasokonahaze sodadutsa watsa. Sodadutsa pyrysuktsa ty simiokbyitsa ty korobyk maha siwatsa tsimaha.

¹⁶Sesus Kiristu humo ahaspirikporêtsa! tsimynakaranaha. Ihumo tsimyspirikponahaze sodadutsa watsa tsimaha. Sodadutsa orokpedawy imiokbyita. Iwaze sisukyrytsitsa orobiktsa ty iharazôrô ba zizaknaha. Atawahi hyrikoso sapybara pehakatsa mybo nimykzoikik iwatahi imysapybara myhumo nazihikik. Niwazubakta! Katsaktsa Sesus Kiristu

humo myspirikporêtsa imysapybara humo ba hỹ tsimaha.

¹⁷Sesus Kiristu

mymyoktyhyrykta tazo bo mymyoktyhyryk. Sesus watsa tsmoziknaha ana hi mozihihikik. Taperykyze sodadutsa watsa. Sodadutsa tsorik imiokbyita taharek humo pu maha. Ikiahatsa hawa mytsaty tsimykaranaha pykyhytutaha. Iwaze Deus harere humo mytsaty tynakaranahaktsa! Deus hyrikoso iharere ty pahahyrinymyryky iwatsahi ikiahatsa sodadutsa watsa tsmoziknaha. Sodadutsa sokorotsapuzeze tyryeze khiwa. Hawa sodadu isukyrytsa nisiba



(Epesios 6.17)

sokorotsapuzeze tyryzekihiwa ty ikiahatsa Deus harere humo Satanas harere nepykba.

¹⁸Deus bo tynapamykysonahaktsa! Hawa Deus hyrikoso mozihikik ana hi tyzapykynahaktsa! Ahazikara byihuja tsiperykynahaktsa. Deus bo typamykysonaha. Tsibyituhukutunaha. Ikiyahatsa tihi:

— O myzo Sesus tuktsa tsyhyryze tsimyzapykynaha. Nanabyitaba atyryktsa tsyhyryze tsimyzapykynaha. ¹⁹Asaktsa mysitsumuêhĩ. Pauro kino niwatihi tsipitsumuêhĩ. Hawa wasania ty Sesus soho motsasoko tsipitsumuêhĩkĩ iwaze ustsá kytsa bo ihumo sihyrinymyrẽtsa moziknaha. Tsiakusukniki. Atahi ahumo ipybybyita tu wasania ty motsasoziu! myzo tsimaha — my. Taparaka Deus Sesus Kiristu soho humo batu mymyhyrinomyry abaka kytsa sizubarẽtsa mymyhyrinomyrykynaha.

²⁰Deus zikpeha iwatahi iharere motsasoikik. Abaka iharere humo kytsa siakryiukrẽnikitsa hurukwy bo zikoktyhyryknaha. Iwatsahi Deus bo katsyhyryze tsimyzapykyikiknaha. Wasani mykara ana hi ibo tsimyzapykyikiknaha. Ikiyahatsa tihi:

— Myzo azikwy ty Pauro bo nyny tsimy iwaze aharere motsasoziuku. Ipybybyita azikwy humo tsipunihikrẽta mozik — tsimaha.

Aba mopykykze kytsa bo mytsaty mykara.

²¹Tikiko kasoho ahabo motsaso. Ata humo kamypokzitsiarẽta mytsy babatawa my. Mypehatsa Sesus tsyhyryze tarabajaziu mynakara. Tsiakzoziurẽta tarabaja my. Tsiakubyrisorokrẽta. ²²Iwatahi ahabo pipeha, hawa mynakara ana soho ahabo motsaso. Iwaze ikiahatsa batu tyso:

— Pauro ja. Yhỹ ja — tsimaha. Atahi ikiahatsa tuk mopamykyso.

Deus pahasapywyky.

²³Deus bo ahatsyhyryze mopamykysoikik. Ipe my:

— O Deus myzo, mypehakatsa Sesus Kiristu niwatihi ahryrytsa bo tysisapywykynaha. Ba paikpa mytsaty zikaha, ikia hi tysiakuwyky. O myzo tysitsumuêhĩ ustsá kytsa wasani sisopyk. Sesus Kiristu harere bo hyỹ mykaranaha iwaze ihumo mospirikpotohinaha iwa tysitsumuêhĩkta!

²⁴O myzo tysisapywyky. Amy humo siaku byizeka sibo tyzapykykta iwaze atuk tahawahi mynapykyryknaha. Sesus humo sipunihikrẽtsa moziknaha — my.

Iwa Deus bo ahatsyhyryze mopamykysoikik. Nepyk niwazuba.

Pauro